



Maurus Dosch damenta nov manader «planisaziun e process»

■ (rtr) *Maurus Dosch* mida l'avrigl 2014 da Radiotelevision Svizra Rumantscha (RTR) a la direcziun generala SSR a Berna. El damenta manader dal sector «planisaziun e process» e cussegliader per il directur general *Roger de Weck*.

Maurus Dosch damenta il successur da *Rainer Keller* en il secretariat general da la SSR sco manader dal sector «planisaziun e process». Keller ha decidì en il rom da sia planisaziun da vita persunala dad ir en pensiun l'avrigl 2015. El vegn a surdar sias incumbensas la primavaira proxima a Maurus Dosch ed a lavurar fin sia pensiun sin la basa da projects per la SSR.

Maurus Dosch lavura dapi indesch onns tar RTR en diversas funcziuns, per il mument sco manader commercial en ils secturs finanzas, persunal, comunicaziun, marketing e logistica ed era sco substitut dal directur *Mariano Tschuor*. Sco commember da la direcziun RTR ha el contribuì essenzialmain al svilup da la reuniun dal radio e la televisiun a la chasa da medias convergenta. El è en pli stà quatter onns en il cussegl da fundaziun da la Chadaina da fortuna ed è enfin la fin da schaner 2014 en il cussegl d'administraziun da Swiss TXT.